

## Don José Villán Fuertes, Secretario do Concello de Carballo - A Coruña

### CERTIFICO:

**Que o Pleno da Corporación Municipal, en sesión Ordinaria celebrada en data luns 25 de novembro de 2019 adoptou, entre outros, o seguinte acordo:**

#### ***"2.- Declaración institucional 25 de novembro - Día Internacional contra a violencia contra as mulleres e as nenas.***

*O Sr. Alcalde dá lectura á parte resolutiva, da declaración institucional con motivo do 25 de novembro, día da eliminación da violencia contra as mulleres e nenas, consensuada na xunta de voceiros do 22 de novembro de 2019, cuio texto se transcribe integramente:*

*«Con motivo do 25 de novembro, Día Internacional contra a Violencia cara ás Mulleres e as nenas, un ano máis queremos resaltar que a violencia contra as mulleres segue existindo, en todas as súas manifestacións; física, psicolóxica, sexual, simbólica, social, económica e en todos os ámbitos; familiar, na relación de parella ou exparella, no ámbito laboral, e tamén no ámbito social ou comunitario.*

*A violencia cara ás mulleres e as nenas e nenos, comprende calquera acto que teña ou poida ter como resultado un dano ou sufrimento ás mulleres polo feito de selo e lesione ou sexa susceptible de lesionar a súa dignidade, integridade ou liberdade, de calquera das formas e nos ámbitos mencionados.*

*É preciso recoñecer a importancia e gravidade das violacións e agresións sexuais na nosa sociedade e a insuficiencia nos recursos de intervención e atención. Segundo datos do propio Consello Xeral do Poder Xudicial hai un 80% de feitos delitivos que non se denuncian. Malia isto, o número de denuncias teñen experimentado un incremento e as persoas expertas da cadea xudicial e de atención alertan ademais dun incremento na súa brutalidade.*

*Así mesmo, a Fiscalía Xeral do Estado ten alertado nas súas recentes edicións da Memoria Anual sobre o aumento da violencia e os delitos de natureza sexual entre as persoas máis novas e relaciónao directamente coa preeminencia da pornografía nas redes sociais e como forma de educación e socialización sexual.*

*Galiza está dotada dun amplo marco legal que inclúe a violencia sexual como unha forma de violencia machista dende o ano 2007. Por iso é necesario que o Estado Español avance na definición da violencia machista que supere o enfoque patriarcal e reduccionista que a limita ao ámbito familiar e da parella.*

*O Concello de Carballo seguirá loitando contra a violencia exercida contra as mulleres e as nenas, seguiremos traballando coas mozas e mozos, xa que a educación é o elemento fundamental para mudar a estrutura da sociedade patriarcal.*

*Continuaremos dedicando esforzos a traballar coas mulleres vítimas de violencia de machista e coas súas familias.*

*Porque queremos un Carballo libre de agresións machistas, porque queremos un Carballo con Agresións 0,0.*

*Por todo o anteriormente exposto:*

*O Pleno do Concello de Carballo manifesta en nome de toda a veciñanza o rexeitamento de calquera tipo de violencia exercida sobre as mulleres e as nenas.*

*O pleno do Concello de Carballo acorda a seguinte*

#### **DECLARACIÓN INSTITUCIONAL**

*Demandar da Xunta de Galiza a mellora da atención e prevención da violencia machista e, particularmente, da violencia sexual, adoptando as seguintes medidas:*

- 1. Garantir a gratuidade da atención xurídica ás vítimas de violencia sexual por ser vítimas de violencia machista e impulsar unha campaña específica para informar da existencia deste recurso.*
- 2. Promover un programa específico de formación en materia de violencia sexual para todos os ámbitos profesionais que traballan na prevención e atención da violencia machista (ámbitos sanitarios, policiais, administrativos e xurídicos, educativos, administración local...).*
- 3. Desenvolver un protocolo específico de atención á violencia sexual, con especial atención ao ámbito xudicial.*

*Demandar do goberno central as seguintes medidas para avanzar no recoñecemento da violencia sexual como violencia machista:*

- 1. introdución no marco legal do concepto de consentimento para mellorar a tipificación e tratamento da violación e das agresións sexuais.*

2. *modificar a definición estatal de violencia de xénero de acordo co Convenio de Istambul de forma que a violencia sexual sexa recoñecida como tal, como xa fixo a lei galega no ano 2007.*
3. *desenvolver as actuacións legais de organización necesarias para que os delitos de violencia sexual sexan instruídos nos xulgados exclusivos de violencia machista.»*

*Sometido o asunto a votación, por unanimidade dos membros con dereito a voto (20), o Pleno Municipal acorda subscribir a declaración institucional antedita.”*

**E para que conste, para os efectos oportunos expido o presente certificado coa reserva establecida no art. 206 do R.O.F., de orde e co visto e prace do Sr. Alcalde, en Carballo, asinado dixitalmente na data que figura ao marxe.**

**V. e Pr.**  
**O alcalde**